

Dewan Negara: Peningkatan Tahap Pendidikan Rakyat Punca Kebergantungan Pekerja Asing
Bernama
13 Disember, 2012

KUALA LUMPUR, 13 Dis (Bernama) -- Pertumbuhan ekonomi yang pesat dan peningkatan taraf pendidikan rakyat Malaysia menjadi faktor kebergantungan negara terhadap tenaga kerja asing, Dewan Negara diberitahu pada Khamis.

Menteri Sumber Manusia Datuk Seri S.Subramaniam berkata peningkatan tahap pendidikan terbukti dengan penurunan kadar rakyat yang hanya menamatkan pendidikan di sekolah rendah iaitu 26 peratus pada tahun 2010, berbanding 61 peratus pada 1990.

"Ini bermakna sekarang ini kira-kira 75 peratus rakyat Malaysia melanjutkan pelajaran lebih dari sekolah rendah ke peringkat SPM (Sijil Pelajaran Malaysia) atau ke peringkat lebih tinggi," katanya ketika menjawab soalan Senator Khoo Soo Seang mengenai faktor kebergantungan kepada warga asing untuk pekerjaan buruh serta langkah-langkah diambil untuk mengurangkan kebergantungan itu.

Subramaniam berkata faktor yang disebut menyebabkan pengurangan tenaga kerja tempatan untuk mengisi jawatan-jawatan di sektor yang memerlukan kemahiran rendah terutama bidang kerja yang dikategorikan sebagai 3D (dirty, difficult, dangerous) yang banyak terdapat dalam sektor pembinaan.

Menurut beliau, terdapat kira-kira 1.4 juta pekerja asing yang bekerja di Malaysia sehingga September lepas.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=915083>